

Nurul Izzah dilantik Pengerusi Jawatankuasa Pemerkasaan TVET - Nasional

Nurul Firdaus Khairi
21 Jun 2018



Dr Maszlee (tengah) mengumumkan perkara itu ketika sidang media di Kementerian Pendidikan Tinggi, hari ini.

PUTRAJAYA - Menteri Pendidikan, Dr Maszlee Malik hari ini mengumumkan penubuhan Jawatankuasa Pemerkasaan Pendidikan dan Latihan Teknikal dan Vokasional Malaysia (TVET) yang akan dipengerusikan oleh Ahli Parlimen Permatang Pauh, Nurul Izzah Anwar.

Menurutnya, jawatankuasa itu berperanan menyediakan laporan untuk memperkasakan dan menaikkan taraf TVET.

"Nurul Izzah merupakan seorang yang mengambil berat mengenai pendidikan TVET dan telah berbincang dengan saya bagaimana TVET dapat membantu golongan muda merebut

peluang pekerjaan dan juga keusahawanan,” katanya dalam sidang media di Kementerian Pendidikan Tinggi, hari ini.

Maszlee berkata, kerajaan sedar akan pentingnya aliran teknikal dan vokasional selaras dengan Manifesto Pakatan Harapan (Harapan) untuk membangunkan aliran ini agar benar-benar setaraf dengan aliran lain dan bukan lagi sebagai pilihan kedua.

Sementara itu, Nurul Izzah ketika ditemui berkata, skop TVET mempunyai banyak potensi dan berpuluh bilion ringgit telah dibelanjakan dari tahun ke tahun untuk mengangkat dan menambah penglibatan pelajar dalam bidang TVET yang dipandang tinggi seperti di negara Jerman.

Menurutnya, beliau mengambil kira mungkin terdapat kelompok lompong yang wujud walaupun ini perkara biasa.

"Kita dengar kontroversi 5,000 pelajar yang tidak mendapat penempatan, jadi kita perbaiki untuk akhirnya melahirkan satu semangat baharu di mana TVET atau sijil yang berkait dengan TVET dipandang setinggi mereka yang pegang ijazah sarjana muda," katanya.

<http://www.sinarharian.com.my/nasional/nurul-izzah-dilantik-pengerusi-jawatankuasa-pemeriksaan-tvet-1.847576>